

歷代儒學存真錄

歷代儒學存真錄

PDC

歷代儒學存真錄卷七

蘇門郭程先雪齋先生定

浚儀田欣乙亭輯

宋

朱子熹字元晦號晦菴徽州府婺源縣人父松字喬
年第進士歷司勳吏部郎中出知饒州卒於官文
公幼穎悟甫能言父指天示之曰天也文公問天
之上有何物父異之授以孝經題其端曰不如是
非人也嘗從羣兒戲沙上端坐以指畫爲八卦稍
長慨然有求道之志受業於劉勉之勉之因松屬

以後事誨之如子以女妻之年十八貢於鄉登進士授泉州府同安縣主簿累遷煥章閣待制侍讀領鴻慶宮祠甯宗慶元五年致仕六年庚申三月甲子卒年七十一臨沒正坐整衣冠遺書屬其子及門人范念德黃幹拳拳以勉學及修正遺書爲言家故貧非其道義一介不取徙建陽考亭簞瓢屢空晏如也其爲學必務窮理以致其知反躬以踐其實而以居敬爲主嘗謂聖賢道統之傳散在方冊聖經之旨不明而道統之傳始晦乃竭其精力以研窮聖賢之經訓所著周易本義啟蒙著卦

考誤詩集傳學庸章句或問語孟集注太極圖通
書西銘解楚辭集注辨證韓文考異所編次語孟
集議孟子指要中庸輯略孝經刊誤小學書通鑑
綱目宋名臣言行錄家禮近思錄程氏遺書伊洛
淵源及儀禮經傳通解文集百卷生徒問答八十
卷別錄十卷皆行於世賜諡曰文特贈寶謨閣直
學士寶慶二年贈太師追封信國公紹定三年改
封徽國公淳祐元年從祀孔廟以其學庸論孟立
於學宮元至正二十二年改封齊國公明景泰六
年置建陽博士嘉靖二年置婺源博士九年補先

儒朱子詔其父從祀崇聖祠崇禎十五年改稱先賢位列漢唐諸儒上 國朝康熙五十一年升

十二哲 見道學傳

周

子敦頤

字茂叔湖南永州府道州人世居營道濂溪

之上初名敦實避諱改父輔成明萬曆二十三年從祀崇聖祠元公天資英睿聞道甚早其學精明微密超然自得於天人性命貞一之統於世泊如也有作聖論處已論文學論治天下論忠聖道失傳作易通太極圖說妙契千百年以來不傳之遺旨上以接堯舜禹湯文武周公孔子顏曾思孟道

統之緒下以啟發後學河南程珦使其二子顥頤
往受學焉每令尋孔顏所樂何事二程之學淵源
於此河東人侯師聖學於二程未悟令訪元公留
對榻三日還自謂有得曰如見天之廣大程亦驚
異曰非從周茂叔來耶其善發人類此黃庭堅稱
其人品甚高胸懷灑落如光風霽月元公幼孤依
舅氏龍圖學士鄭珣愛之如子蔭補分甯縣主簿
累遷廣南東路轉運判官提點刑獄以洗冤澤物
爲己任會有疾又水齧其母夫人墓遂求郡知南
康軍因家廬山蓮花峰下前有溪合於湓江取營

道所居濂溪以名之學者稱爲濂溪先生卒年五十七寶錄云茂叔短於取名而樂於求志薄於徼福而厚於得民菲於奉身而燕及惇嫜陋於希世而尙友千古後百餘年洛閩學大行天子下太常議易名考功上議曰敦頤博學力行會道有元脉絡貫通上接洙泗條理精察下逮洛閩請以元易名庶幾百世之下知孟氏之後觀聖道必自敦頤始理宗淳祐元年封汝南伯從祀孔廟元文宗至順二年加封道國公明景泰六年置博士嘉靖九年稱先儒周子崇禎十五年稱先賢

見道學傳並理學宗傳

張

子厚先世家大梁父迪仁宗朝爲殿中丞知

涪州早卒不能歸僑寓陝西鳳翔府郿縣橫渠嶺
之南因家焉明公自幼志節不羣孤獨自立無所
不學兼喜談兵年十八慨然以功名自許爲書謁
范仲淹一見知其遠器欲成就之警曰名教中自
有可樂何事於兵因勸讀中庸明公以爲未足又
訪諸釋老累年知無所得乃反而求之六經嘗於
京師講易聽從者眾一夕二程至與論易有得語
人曰此見二程深明易道吾所弗及汝輩可往師
之翌日命撤坐輟講益與二程論道學之要旣罷

油然自信曰吾道自足何事旁求盡棄異學淳如
也由進士第爲邠州司法參軍遷雲巖縣令呂公
著言其有古學神宗召見問治道對曰爲政不法
三代終小道也帝悅授崇文院校書與王安石不
合引疾歸屏居南山下敝衣蔬食危坐一室左圖
右書俯讀仰思有得則識之或中夜起坐取燭以
記其志道精思未始須臾息亦未嘗須臾忘也與
諸生講學務先以禮每告以知禮成性變化氣質
之道必求如聖人而後已世稱爲橫渠先生呂大
防薦其善發明聖人之遺旨始終論治略可復古

宜還其舊職以備咨訪乃詔知太常禮院又與有司議禮不合仍引歸行次臨潼沐浴更衣而寢旦而卒年五十八貧無以斂門人共買棺奉其喪還明公平生尊禮貴德樂天安命以易爲宗以中庸爲體以孔孟爲師法嘗與其徒正經界分宅里立斂法廣儲蓄以及學校之法皆條理成書所著正蒙西銘至今尊之甯宗嘉定十三年賜諡曰明理宗淳祐元年追封鄆伯從祀孔廟明嘉靖九年稱先儒張子天啟二年置博士崇禎十五年改稱先賢

國朝雍正二年詔張子父迪增祀崇聖祠

見道學傳

程顥字伯淳先世居中山博野後爲河南府洛陽縣人父珦字伯溫爲大中大夫致仕卒年八十五明嘉靖十年從祀崇聖祠純公生而神明年十歲能詩賦十五六時與母弟伊川從周元公受學慨然有求道之志意厭科舉之業謂孟子後而聖學不傳以興起斯文爲己任故著論曰道之不明異端害之也昔之言近而易知今之害深而難辨昔之惑人也乘其卑暗今之惑人也因其高明累數百言皆深闢二氏之學又與張載論定性書二十六

始舉進士授京兆府鄠縣主簿屢調縣令改著作
郎授太子中允權監察御史哲宗召爲宗正寺丞
未任而卒年五十四純公居洛十餘年與弟正叔
講學於家化行鄉黨菽粟不繼而事親曲盡其歡
其教學有序及門之士皆造就有得往來過洛造
其門者虛往實歸太師文彥博題其墓曰明道先
生弟正叔表之曰孟子死聖學不傳學不傳千載
無真儒先生生一千四百年之後一人而已甯宗
賜諡曰純淳祐元年封河南伯從祀孔廟元至順
二年加封豫國公明嘉靖九年稱先儒程子崇禎

三年置博士十五年改稱先賢

見道學傳

程頤字正叔河南洛陽人明道之母弟也幼高朗有

大志年十四五與兄純公受學於春陵銳然欲學
聖人十八歲伏闕上書勸仁宗黜世俗之論以王
道爲心遊太學見胡瑗問顏子所好何學因著論
略一篇瑗得其文大驚異之卽處以學職治平元
豐間大臣屢薦不起後司馬光呂公著疏其行義
謂頤有經天緯地之才制禮作樂之具年逾五十
不求仕進真儒者之高蹈聖世之逸民望擢以不
次使士類有所矜式哲宗授以西京國子教授尋

召爲秘書郎崇政殿說書徽宗崇甯五年致仕大
觀元年九月卒於家年七十五葬伊川祖塋世稱
爲伊川先生其學本於至誠以四子書爲標準而
達於六經動止語默一以聖人爲師卒得孔孟不
傳之學爲諸儒倡其言之旨若布帛菽粟知德者
尤尊崇之惟綴聖人遺書傳之後世庶幾功業有
補所著易春秋傳問答語錄至今宗仰甯宗嘉定
十三年賜諡曰正理宗淳祐元年封伊陽伯從祀
孔廟元文宗至順二年加封洛國公明景泰六年
置博士嘉靖九年稱先儒程子崇禎十五年改稱

先賢

見道學傳

邵雍字堯夫順天府涿州人本姬姓系出召公故世爲燕人年三十從父古徙居河南府嵩縣鳴臯山葬其親於伊水上遂家焉堯夫英資天挺慨然有大志始學於蘇門山百源之上堅苦刻厲寒不爐暑不扇夜不就席者數年已而嘆曰昔人尙友千古而吾未及四方乃踰河汾涉淮漢周流齊魯宋鄭之墟久而幡然來歸曰道在是矣遂不復出得北海李之才之傳探賾索隱妙悟神契常著論天地萬物之道凡十餘萬言世鮮有知其道者仁宗

詔舉遺逸留守王拱辰以雍應詔授將作監主簿
神宗復求逸士中丞呂誨復薦之補潁川團練推
官皆固辭不受居嘗蓬蓽環堵不芘風雨而怡然
有所樂歲時耕稼僅給衣食名其居曰安樂窩自
號安樂先生仕宦道洛者或不之公府必之堯夫
一時賢者悅其德不賢者服其化熙寧新法行吏
多投劾時門人故友皆遺書訪之堯夫曰此賢者
所當盡力之時新法固嚴能寬一分則民受一分
賜矣投劾何益耶程明道初侍其父識堯夫退而
嘆曰堯夫內聖外王之學也又曰堯夫知慮絕人

遇事能前知程伊川曰其心虛明自能知之卧病
時司馬君實張子厚二程子晨夕候之熙甯十年
卒年六十七贈秘書省著作郎元祐元年賜諡康
節程明道爲銘墓稱其道純一不雜就其所至可
謂安且成矣所著有聲音論皇極經世觀物內外
篇漁樵問對擊壤集行於世度宗咸淳三年從祀
孔廟追封新安伯明嘉靖九年稱先儒邵子崇禎
三年置博士十五年改稱先賢

見道學傳兼理學
宗傳

胡瑗字翼之揚州府泰州如臯縣人門人稱爲安定
先生其先世本長安復居陵州祖司寇參軍修己